

Libertad e responsablada

Il credo da president Joachim Gauck

DA GUIU SOBIELA-CAANITZ

■ **Ils 18 da mars 2012, amez la crisa europeica, è l'elecziun da Joachim Gauck (*1940) a la presidenza da la Republica federala da Germania vegnida gist en il dretg mument per far endamen l'essenzial. «I turna il temp dals fundament», di in erox d'André Malraux (1901–1976) en «L'Espoir», roman da la guerra civila spagnola. Ma tgenins èn ils fundament? Per Gauck è quai fitg cler: l'essenzial è la libertad. El ha vivì en la Germania comunista dapi la fundaziun da la «DDR» 1949 enfin a la crudada dal mir da Berlin 1989. 1951 èn dus umens en civil vegnids per ses bab. Sin quai n'ha la mamma ed ils uffants, durant dus onns, dudi nagut pli d'el. Pir la mort dal dictatur Josif Dschugaschvili «Stalin» (1879–1953) ha midà insatge: «Ils 2 da settember 1953 han ins infurmà mia mamma a bucca, sin cumond explicit da la 'Stasi', ch'ins haja ‚sentenzià ses um ils 6 da fanadur 1951 a 25 onns prashun pervi da sia activitad ostila cunter il stadi occupant'. Uss almain saveva' ch'el viveva e sa chattava en l'Uniuin sovietica» (1). 1955 ha Konrad Adenauer (1876–1967), chancelier da la republica federala da Germania, cuntanschi la relaschada dals davos prashuniers tu-**

destgs. Lur è il bab turnà en la «DDR» suenter onns da lavur sfurzada en la regiun dal Lai Baical (Sibiria). Ma il giuven Joachim, sco figl d'in inimi dal communissem, n'ha betg dastgà studegiar germanistica; el ha pia sa decidì per la teologia ed è vegnì plevon da la Baselgia evangelica da Mecklenburg. La «Stasi» l'ha observà davent da 1983. Dapi 1989 sa dedtgescha'l a la politica; 1990–2000 è'l stà delegà da la Germania reunida per las actas ed ils documents da l'anteriura «Stasi». 2003–2012 era'l parsura da l'uniun d'util public «Gegen Vergessen – Für Demokratie» che sa deditgescha a la didactica davart il nazissem e la «DDR».

Solidarità ed egoissem

A Gauck han ins reproschà, già avant sia elecziun a la presidenza, ch'el discurrea memia bler da libertad. A questa critica ha'l replitgà senza targlinar: Libertad, gea, ma complettada da la responsablada. Quai ans maina enavos tar ina veglia vardad: I na tanscha betg da sa liberar dals impediments; tiers duain ins esser liber per ina finamira determinada, pia disponibil per ina lezia u missiun ch'ins definescha sez. Dalonder la sentenza dal grond giurist Ernst-Wolfgang Böckenförde, anteriur derschader dal Tribunal costituziunal federal tudestg, ch'ins ha

gist cità per commentar l'elecziun da Gauck: «Il stadi liberal e secularisà viva da premissas ch'el sez na po betg garantir» (2). Ina da quellas premissas è segir la responsablada. Gauck: «Cur che la libertad perda tuttafatg sia forza radianta, crescha quai che nus faschain già atras a moda e maniera massiva. L'uman baratta sia vita da burgais cun ina vita da consument. El na va betg pli a vuschar, na fa betg pli part da comités d'acziun, sa retira da la vita publica, da la politica (...). Igl è evident ch'ins na po mai viver cun la libertad senza vegnir disturbà (...). Sia autra fatscha ans fa snuizi – quella dal chapitalissem rapazi, da la calculaziun niva, da l'egoissem da gruppa, da la perscrutaziun brutala senza resguards etics, tut quai, a la fin dals quintes, favurisescha l'egoissem ed extingua la solidarità e la compassiun per il cunman. Il snuizi avant lezza autra fatscha da la libertad munta finalmain in snuizi avant nussezs, avant nosa atgna energia destructiva» (3). Solidarità ed egoissem: La libertad va vi e nà tranter dus pols, e Gauck als descriva fitg bain.

1. Joachim Gauck, *Winter im Sommer – Frühling im Herbst*. Minca (Siedler, ISBN 978-3-88680-935-6) 2009, p. 48.
2. Jürg Himmelreich, *Das evangelische Pfarrhaus schlägt zurück*. En: «Neue Zürcher Zeitung», 22 da mars 2012, p. 21.
3. Joachim Gauck (sco nota 1), pp. 340–341.